

ESKU-HARTZE HUMANITARIOETARAKO LAGUNTZAK IZAPIDETZEKO JARRAIBIDEAK

Vitoria-Gasteiz, 2026ko martxoaren 30^a

AURKIBIDEA

I. SARRERA	3
II. AURREKONTUAREN OINARRIZKO ELEMENTUAK	3
III. AURREKONTU-PARTIDAK	4
A. ZUZENEKO KOSTUAK	
A.I. Identifikazioa	
A.II. Komunitate eta pertsonen babesa	
A.III. Erakunde humanitarioak indartzea	
A.IV. Lekukotza, salaketa eta eragina	
A.V. Langileak	
A.VI. Funtzionamendua	
A.VII. Ebaluazioa eta auditoria	
B. ZEHARKAKO GASTUAK	

I. SARRERA

Azken urteetan, erakundeek hainbat kontsulta egin dizkiote eLankidetzaz-Lankidetzarako eta Elkartasunerako Euskal Agentziari, ekintza humanitarioetarako laguntzak nola izapidetu eta kudeatu behar diren jakiteko, eta eLankidetzak kontsulta horiek banan-banan ebatzi eta sozializatu ditu horretarako antolatutako topaketetan.

Jarraibide hauen helburua erakunde interesdunei deialdiaren oinarriak interpretatzeko eta aplikatzeko baldintzak jakinaraztea da. Aurrekontuak egin eta egikaritzearekin zerikusia dute gai gehienek, baina kudeaketarekin lotutako beste zenbait gai ere bildu dira.

Erakunde onuradunek honako dokumentu eta bideo hauek ere jarri dituzte eskuragarri webgunean, laguntzak behar bezala izapidetzen eta kudeatzen laguntzeko:

- "Lankidetzaz Agenteen Erregistroko kodeen zerrenda"
- "Tokiko erakundearen kodeen zerrenda"
- "CRS zerrenda", "GJH zerrenda", "CRS-GJH zerrenda"
- "Esku-hartze humanitarioen ikuspegia"
- "EHko proposamen teknikoa" eta "EHko proposamen teknikoaren azalpena"
- "EHaren aurrekontua"
- "Gorabehera informatikoen erregistroa"
- "Nire karpeta erabiltzeko gida"

II. AURREKONTUAREN OINARRIZKO ELEMENTUAK

- Eskaera normalizatuan, erakunde interesdunak esku-hartze humanitario horretarako eskatutako aurrekontua biltzen da, eta hartan bereizten dira batetik, **zuzeneko kostuak**, hau da, identifikaziorako, egikaritzeko, ebaluaziorako eta auditoriarako beharrezkoak diren kostuak (A.I.-A.VII. partidak), eta, bestetik, **zeharkako kostuak**, edo erakunde onuradunek kudeaketa eta jarraipenerako egiten dituztenak (B partida).

- Egikaritzearen eraginpeko herrialdean edo herrialdeetan legezkoa den monetarekin egindako aurrekontuak eurotan zenbat diren kalkulatzeko, honako **kanbio-tasa** hauek erabiliko dira:

- Ekintza humanitarioko proiektuak. Europako Banku Zentralak edo proiektua egikaritzeko den herrialdeko edo herrialdeetako Banku Zentralak eskaeran adierazitako egunerako ezarritako kanbio-tasa hartuko da erreferentzia gisa. Eskaeran adierazitako eguna, gehienez ere, hilabete bat lehenago izango da aurkezpen-eguna baino. Informazio horretan sartzeko aukerarik ez badago, zenbait webgunek (esaterako, www.oanda.com) eskainitako kanbio-tasa erabiltzeko aukera izango da. Erakunde onuradunak eskaera normalizatuan adieraziko du zer kanbio-tasa erabili duen eta zer iturritatik lortu duen.

Ekintza humanitarioko estrategiak. Erreferentzia gisa hartuko da Euskal Herriko Agintaritzaren Aldizkarian deialdia argitaratzen den eguneko kanbio-tasa, Europako Banku Zentralak edo estrategia egikaritzeko den herrialdeko edo herrialdeetako Banku Zentralak ezarritakoa betez. Informazioan sartzeko aukerarik ez badago, zenbait webgunek (esaterako, www.oanda.com) eskainitako kanbio-tasa erabiltzeko aukera izango da. Erakunde onuradunak eskaera normalizatuan adieraziko du zer kanbio-tasa erabili duen eta zer iturritatik lortu duen.

- **Diruz laguntzeko moduko gastuak** dira, esku-hartzearen izaerarekin bat etorri eta

behar-beharrezkoak izateaz gain, egikaritzerako ezarritako epearen barruan egiten direnak. Diruz laguntzeko moduko gastuek zerikusia dute, besteak beste, input eta materialen erosketa eta garraioarekin, ekipamendu eta guneen alokairuarekin, pertsona fisiko eta juridikoen kontratazioarekin, bidaia eta egonaldiak egitearekin, eta erakunde onuradunak edo tokiko bazkideak egindako produktu eta materialak sortu eta zabaltzearekin, jarraibide hauetan biltzen diren kasuetan.

- Balio Erantsiaren gaineko Zerga (BEZa) eta zerga baliokideak **ez dira diruz laguntzeko moduko gastuak**, baldin eta erakunde onuradunak edo tokiko bazkideak berreskura baditzaie, ezta indarreko betebeharrak ez betetzetik eratorritako isunak edo zigorrak ere.

- Eskaeraren unean ez da **proformako fakturarik** aurkeztu beharko aurrekontuan proposatutako kostua bermatzeko, baina kostua ez da merkatuko balioa baino handiagoa izango.

- **Tokiko baliabide materialei eta giza baliabideei** lehentasuna emango zaie. Baliabideek egokiak izan behar dute efizientzia ekonomikoaren ikuspegitik, jasangarriak ingurumenaren ikuspegitik, eta arduratsuak gizartearen ikuspegitik. Gainera, tokiko kultura errespetatu behar dute, eta tokiko langileen kontratazioa balioetsiko da.

- Eskaera normalizatuarekin batera, eta balioespen-xedeetarako, erakunde interesdunak aurrekontu xehatua aurkezteko aukera izango du, eLankidetzak bere webgunean emandako formatuan. Aurrekontuko Excelean lau fitxa bereizten dira: laburpena, aurrekontua partiden arabera, aurrekontua jardueren arabera eta langileen egozpen-laburpena.

Gastuen sailkapena deialdiaren oinarrietan bildutako partidei jarraikiz egingo da. Hurrengo atalean, gastuak sailkatzeko jarraibideak bildu dira.

III. AURREKONTU-PARTIDAK

A. ZUZENEKO KOSTUAK

A.I. Identifikazioa

Esku-hartzearen identifikazio-ekintzekin zuzenean lotutako gastuak bilduko dira partida honetan. Honako hauek dira identifikazio-gastuak, besteak beste:

- Erakunde onuradunak edo tokiko bazkideak, identifikazioa egiteko bereziki, pertsona fisiko edo juridikoak kontratatzea.
- Identifikazioan parte hartzen duten pertsonen bidaia eta egonaldietarako gastuak, hala nola garraioa, ostatua, elikadura, etab.
- Esplorazio-misioan behar diren komunikazio-ekipamendu, proiektagailu, ordenagailu eta elektrizitate-sorgailuen alokairua.
- Misioa egiteko behar diren input eta materialak erostea.
- Identifikaziorako behar diren bileretarako lokal edo guneen alokairua.

Gastu horiek egin behar dira, gehienez ere, esku-hartzearen aurkezpen-dataren aurreko bost hilabeteen barruan.

A.II. Komunitate eta pertsonen babesa

Krisiak eragindako komunitate eta pertsonen babesarekin zuzenean lotutako gastuak

bilduko dira partida honetan. Ondasun edo zerbitzuak dira, besteak beste, honako hauek ematea helburu dutenak: elikagaiak, ura eta saneamendua; aterpea eta babeslekua; oinarritzko azpiegituren berreraikuntza eta birgaikuntza; osasun- eta hezkuntza-zerbitzuak; eta laguntza juridiko eta psikosoziala. Horrez gain, gaitasunen indartzea, partaidetza edo diru-sarrerak sortzen dituzten jarduerak bultzatzea ere dute helburu ondasun edo zerbitzu horiek. Hornidura gauzatan edo eskudirutan egiteko aukera izango da, azken kasu horretan diru-ekarpen edo bonuen bitartez. Komunitate eta pertsonen babeserako gastuak honako hauek dira, besteak beste:

- Erakunde onuradunak edo tokiko bazkideak, aipatutako zerbitzuak eskaintzeko bereziki, pertsona fisiko edo juridikoak kontratatzea.
- Komunitateko kideek egindako lanengatiko laguntza ekonomikoak edo soldadak.
- Babesarekin lotutako bidaia eta egonaldien gastuak: garraioa, ostalua, mantenua...
- Kaltetutako komunitateak babesteko helburuarekin zuzenean lotutako ekipamenduen alokairua edo erosketa: ibilgailuak, komunikazio-ekipamenduak, ordenagailuak, kamerak, elektrizitate-sorgailuak.... Esku-hartzearen kudeaketa orokorrerako tokiko bazkideari lotutako alokairua edo erosketa A.VI partidan sartuko da.
- Input eta materialen erosketa: askotariko kitak, elikagaiak eta nutrizio-osagarriak, sukaldeko tresnak, higiene eta garbiketa-lanetarako materialak, aterpe eta babeslekuetarako materialak, txerto eta input medikoak, hezkuntza-materialak, nekazaritzako tresna eta inputak, haziak, haztegiak, eraikuntzako material eta tresnak, ur-puntuak, komunak...
- Ekipamendu, input eta material horiek biltegitatu eta garraiatzea.
- Komunitatearekin biltzeko, herritarrak gaitzeko eta beste hainbat zerbitzu eskaintzeko lokal edo guneen alokairua...

A.III. Erakunde humanitarioak indartzea

Erakunde humanitarioen gaitasunak indartzearekin zuzenean lotutako gastuak bilduko dira partida honetan.

Tokiko erakundeen gaitasunak indartuko dira ikuspegi integral batetik, hau da, politikagintzan eta plangintzan lagunduz, lidergoa eta kudeaketa sustatuz, gaitasun teknikoak indartuz, zeharkako ikuspegietan sakonduz, etab.

Erakunde onuradunen kasurako, laneko estrategia eta dinamiketan zeharkako ikuspegiak eta kontu-ematea txertatzearekin lotutako gaitasunak indartu beharko dira. Honako hauek hartuko dira erakunde humanitarioak indartzeko gastutzat:

- Erakunde onuradunak edo tokiko bazkideak, prestakuntzak edo aholkularitzak egiteko bereziki, pertsona fisiko edo juridikoak kontratatzea.
- Prestakuntza-tailerretan parte hartzen duten pertsonen bidaia eta egonaldietarako gastuak: garraioa, ostalua, elikadura...
- Erakunde humanitarioak indartzeko helburuarekin zuzenean lotutako ekipamenduen alokairua: ordenagailuak, proiektagailuak, kamerak... Erosketa A.VI partidan bilduko da.
- Erakunde humanitarioak indartzeko helburuarekin zuzenean lotutako input eta materialen erosketa.
- Erakunde humanitarioak indartzeko lokal edo guneen alokairua: aretoak, auditoriumak...

A.IV. Lekukotza, salaketa eta eragina

Lekukotzak biltzearekin, txostenak egin eta zabaltzearekin eta kaltetutako pertsonen egoera salatzeko eta tokiko, estatuko eta nazioarteko guneetan eragiteko jarduerekin zuzenean lotutako gastuak bilduko dira partida honetan.

Honako hauek hartuko dira, besteak beste, lekukotzarako, salaketarako eta eragiteko gastutzat:

- Tokiko bazkideak edo erakunde onuradunak — lekukotza emateko, salatzeko eta eragiteko jardueretarako bereziki— pertsona fisiko edo juridikoak kontratatzea: ikerketa-taldeak, aholkularitzak, itzulpenak, diagramazioa...
- Ekintza horiekin lotutako bidaia eta egonaldietako gastuak.
- Lekukotzak biltzeko, salaketa-ekintzak egiteko edo eragiteko helburuarekin zuzenean lotutako ekipamenduen alokairua: kamerak, proiektagailua, ordenagailuak... Erosketa A.VI partidan bilduko da.
- Lekukotzak biltzeko, salaketak egiteko edo eragiteko helburuarekin zuzenean lotutako input eta materialak erostea: bulegoko materialak, fotokopiak, inprimatzeak...
- Landutako produktu eta materialak sortu eta zabaltzea: bideoak, liburuxkak, posterrak, kartelak...
- Lekukotza emateko, salatzeko eta eragiteko jardueretarako lokal edo guneen alokairua: aretoak, auditoriumak...

A.V. Langileak

Koordinazio orokorra, kudeaketa, jarraipena eta ebaluazio, logistika, kontabilitate, informatika, segurtasun edo garbiketako lanetarako esku-hartzeari atxikitako zerbitzuetako langileen lanaldi osoko edo partzialeko kontratazio iraunkorreko gastuak bilduko dira partida honetan.

Babesteko, antolamendua indartzeko eta lekukotza eman, salatu eta eragiteko ekintzetarako bereziki egindako mota guztietako kontratazioak dagozkien partidetan islatuko dira.

Soldatak aurreikusteko orduan, baliabideen arrazoizko erabilera bat sustatzeko asmoz, esku-hartzea martxan dagoen herrialdearen soldata ertainak kontuan hartuko dira, sektore eta maila profesional bakoitzeko.

Atal horretan bilduko dira, halaber, atzerriko langileak kontratatzeako gastuak. Arrazoizko soldatatzat joko da 54.000€ urtean lanaldi osoan, lan-kostu guztiak barne, erakunde bakoitzak ebatzitako ordainsari kopuruan banatuta. Jatorritik helmugarako nazioarteko eta estatu barruko bidaiak, aseguruak eta bisatua lortzeko gastuak ere bilduko dira. Etxebizitzako, mantenuko edo joan-etorrietako gastuak, norberarenak edo senideenak, bakarrik egotzi daitezke nominan bilduta badaude.

A.VI. Funtzionamendua

Esku-hartzea oro har kudeatzeko tokiko bazkidearen zerbitzu eta eraikinetako gastuak funtzionamendu-gastutzat hartuko dira, esku-hartzearekin duten loturaren arabera hainbanatuta.

Ibilgailuetan, bulegoko alokairuan, ordenagailuetan, inprimagailuan, bulegoko materialean, elektrizitatean, ur-zerbitzuan, interneten, telefonoan, segurtasun-sistemetan, banku-gastuetan, haurtzaindegiz-zerbitzuetan eta ikustaraztean egindako

gastuak eta antzekoak hartuko dira funtzionamendu-gastutzat.

Atal honetan, halaber, esku-hartzeko jarraipenean parte hartzen duten tokiko langileen bidaiak eta egonaldietarako gastuak bilduko dira.

A.VII. Ebaluazioa eta auditoria

Esku-hartzearen ebaluazi (kanpoko edo mistoa) eta auditoriarekin zuzenean lotutako gastuak bilduko dira partida honetan, eta 6 hilabeteren barruan egotzi ahalko dira egikaritzea amaitzen den egunaz geroztik. Auditoriekin zerikusia duen informazio guztia dokumentu honen VI. atalean jaso da.

B. ZEHARKAKO KOSTUAK

Esku-hartzearen kudeaketa eta jarraipenerako erakunde onuradunek egiten dituzten gastuak bilduko dira partida honetan.

Zeregin horiek egiteko behar diren zenbatekoak diruz lagundutako zenbatekoaren arabera aldatzen dira, eta progresiboak izan beharko lukete. Ekintza humanitarioko proiektuen lerrorako, emandako diru-laguntzaren %10 izango da gehienez zuzeneko kosteen zenbatekoa. Aldiz, ekintza humanitarioko estrategien lerrorako, bi tarte egongo dira, zuzeneko kostuen % 10 aplikatuko luke 200.000 euroetako diru-laguntzaren lehen tarterako, eta, zenbatekoa horretatik aurrera, zuzeneko kostuen %7.